

欽定全唐文

欽定全唐文卷六百九十九目錄

李德裕

四

賜何重順詔

賜張仲武詔

賜劉沔茂元詔

賜彥佐詔意

賜石雄詔意

賜劉沔詔意

賜李石詔意

金文卷之三  
賜王元達詔書

賜李石詔意

賜王宰詔意

賜張仲武詔意

賜劉沔詔意

賜王宰詔意

賜王元達何宏敬詔意

賜王元達何宏敬詔意

賜緣邊諸鎮密詔意

賜王宰詔意

處置楊弁勅

誅郭誼等勅

誅張谷等告示中外勅

賜回鶻可汗書

賜回鶻書意

賜回鶻可汗書意

賜回鶻可汗書

賜太和公主勅書

欽定全唐文卷六百九十九

李德裕

四

賜何重順詔

勅重順卿代傳忠孝志在功名朕每用注心豈忘終食况  
卿先父當太和之際已有誠款思靖鄰封臣節昭彰遐邇  
稱嘆澤潞一軍素聞忠順從前命帥皆是儒臣穆宗以劉  
悟有歸闕之功委之心膂令居善地鎮靖一方及殂謝之  
時不能堅守臣節遂使三軍上請以幼子總戎其時朝廷  
因循姑務安靖授以旄鈸事蓋從權今從諫疾恙所侵頗

聞綿惙昨士靡奏至大將及下復請劉稹權知軍務朕深惜劉悟一門自夫逸懷以來累代忠節今劉稹又欲自簒其門風當撤瑟之辰罔聞憂戚嘗藥之際更窺兵權尤爲臣子所當共棄卿宜訓練戎旅嚴固封疆候彼軍中變便須遣書告諭令其三軍送劉稹歸闕請朝廷推新擇帥朕必遺舊德重望委之撫循劉稹厚加爵賞別有任用如妄自制置邀求寵榮國家典法亦難寬宥澤潞一鎮與卿事體不同勿爲子孫之謀欲存輔車之勢但能顯立功效自然福及後昆勉務良圖副茲委遇高秩厚祿無所恪

焉

賜張仲武詔

卿智畧挺生忠誠特著每陳章奏皆契朕心言念壯猷無忘寤寐今緣從諫疾病頗以沉綿深慮將校異謀妄有制置太原地連河朔城府空虛已詔劉沔旋師却歸本鎮又緣回鶻餘燼未滅塞上須有防虞藉卿長才列於禦侮邊境戎事悉以副卿宜深體朕懷勉宏方畧控馭朔塞爲我長城當使早殄餘妖永清絕漠副茲委遇以保功名

賜劉沔茂元詔

勅古者涼風至白露下天子乃命將厲兵以征不義申令  
誓衆今則其時况寡收司刑助天而肅殺金星動色應節  
而耀芒咨爾帥臣爲予之佑得不敬順天道振揚兵威近  
有詔書令取七月中旬五道齊進王元達久蓄忠憤爲國  
除殘率兵先諸軍深入其險阻拔宣務要害之壘絕堯山  
應援之兵既以扼咽必當破膽而卿不務疾雷先奮欲以  
歲月勝彼凡爲將帥誰不樂此豈祭遵之安重致樂伯之  
遷延且不副於詔書以後期於成德若未可深入亦要先  
聲宜早進軍速臨賊境樹立城柵羅列旌旗深溝高壘勿

與之戰兼擇猛將時出奇鋒令彼一方疲於奔命如此足  
分賊勢益壯東師昔趙充國征羌漢宣帝詔曰太白出高  
用兵深入敢戰者吉卿宜思古名將早立奇功無執狐疑  
之心勉務鷹揚之舉國之大事賞罰必行當體朕懷勿稽  
詔命想宜知悉

賜彥佐詔意

卿累當大任實總元戎旣行節制之師須務綏懷之德養  
威持重屬於卿至於負羽先登搴旗深入本非將帥之  
事當假拳勇之材况自古出師皆有副貳臨難則權以相

濟料敵則智以相資故韓信伐趙張耳爲貳吳漢征蜀劉尚副軍國朝以來多用此制李勣之取平壤參以道宗李靖之襲陰山副之公謹近者劉沔全師北伐按甲雲州委石雄先鋒大破回鶻朕以石雄近摧醜虜已著威名久在徐州諳練士卒今輟自天德與卿副領諸軍卿宜選徐州陳許精兵三千人便令先入勵其猛氣必立奇功倘能挫覆妖巢亦自勲歸元帥勉以率下深務協心體朕至懷以圖不績

賜石雄詔意

勅石雄古者有必勝之將無必勝之人欲立奇功實在謀  
帥朕所以求鷙鵠於累百得飛將於無雙總率諸軍以臨  
賊境况卿受尺一之詔初無辦嚴盤丈八之矛果能盪寇  
眷言勲績深注余懷近聞從諫時百姓相驚云卿以七千  
兵至數告於眾魄兆於人今天策向晨已及成軍之候龍  
驤建旆必叶渡江之謠舊史昭然冥符可驗加以天道在  
乎西北順歲有功福星煥乎龍庭爲國大慶勉宏方畧契  
此休徵昔鍾會以二十萬兵頓於劒閣鄧艾纔一萬眾直  
抵城都只在決機豈由眾寡知卿能辦故諭此懷然聞卿

每自履軍常先士卒既爲輕敵未足耀奇朕借卿一舉之功以定必擒之計至於小陣不可自行魏武帝嘗戒夏侯妙才曰爲將當有怯時不可但恃勇也當以勇爲本行之以智計但無知任勇一匹夫敵耳張遼單身入昌豨家魏武責曰此非大將法今卿爲萬人之帥啟十乘之行舉必貴謀動資持重報國在於平賊不在輕身爲將本於坐籌寧勞陷陣卿宜以朕之戒嘗自書紳務建功名副茲委遇

賜劉沔詔意

緣卿二年在外城府久虛今殘虜未平南北皆有戎事欲

令卿却歸本鎮應接兩隅行營諸軍未知所付聞王逢頗  
有武用卿所素知今已追赴太原欲令充本道行營都知  
兵馬使又緣例偏裨日近官秩尚卑指揮諸軍未即宜稱  
今緣石雄王宰皆欲進兵得卿一軍齊入足分賊勢卿宜  
審自籌度歸本鎮後在朝及側近武臣誰人堪付行營兵  
事宜密狀具一兩人進來如卿離行營後兵力事勢深入  
未得亦須審具事實聞奏不要隱情今取決於卿切在審  
詳

賜李石詔意

訪聞近日賊中轉更窮蹙自相殺戮人心不安即日軍權  
多在郭誼因此誘動必應事機李不是郭誼親密尤合相  
信卿宜暫追赴使令與郭誼書諭以利害遣其自圖劉稹  
早務歸降倘效誠款必重酬賞卿宜面看李丕手疏兼令  
便自封題分付王逢遣密作計召軍人百姓送入澤潞其  
書草卿宜封進

賜王元達詔書

材幹筋革出自江淮除進奉之外并勅令所禁蓋以有國  
之制固須立防朝廷法度理當畫一卿國之懿戚時之信

臣方進勁兵坐清殘孽誠宜假以利器壯軍威朕之於卿固無愛惜但以河朔數鎮事體應同若一度賜卿必轉相援例恩信不一非撫御之遠圖賜與頻繁隳朝廷之舊制卿是朕之心腹必合樂守憲章故示至懷想當知悉

賜李石詔意

省所奏劉稹令賈羣齋李恬書與卿將兵屬同赴闕庭兼請歸葬東都事宜具悉比者河朔諸鎮惟淄青變詐最多劉悟隨來舊將皆習見此事察其情僞深要精詳蓋緣四面王師尅期關八字石雄王宰已據天井卿當道又得石會

既失重關之嶮將弋在穴之妖鎮衛勁兵皆臨境上城孤  
援絕情計已窮所以密將款詞歸命上相恐是偷安旬月  
潰緩王師稍得自完復來侵軼况饋運日有所費春作漸  
已及時勞我師徒恐非至計卿與其要約令面縛來降卿  
即馳至界首親自受納苟不如此且須進軍必不得因此  
遷延令其得計仍不得先受章表便與奏聞今賜與劉稹  
書白想宜知悉

賜王宰詔意

省所奏差張公輔入澤州潞州亦粗得賊中軍情若許招

誘乞賜詔命事宜具悉劉稹喪父之初已拒朝命旋又焚  
爇晉絳廬舍侵逼萬善孤軍罪惡貫盈言詞甚悖自卿全  
師壓境頻挫其勢尋得天井重關下臨高平危壁邇來頗  
自知懼方獻僞詞然天奪其心鬼迷其志宋人已病不告  
析骸之情朱鮪乞降曾無面縛之效尚聞張皇叛卒覬望  
鴻恩不戢羣兇徒云繼襲想卿忠憤必志梟夷况自去年  
以來闕頻奄畢今又福星煥耀正臨天駟東漢書云畢爲  
天網網羅不善之人房爲明堂方集重華之慶懸象昭晰  
前史所書朕奉天道以行誅守祖宗之成法顧茲小寇終

不貸刑亦知晏實是卿之愛弟將申大義在抑私懷豈無  
鶴原固慎名器今料其初通信使必謂卿且駐軍想彼叛  
徒猶希洗雪乘此討襲必有奇功韓信襲厯下之軍李靖  
剪陰山之寇皆因敵心懈弛故得機討不遺想卿久習兵  
符備詳虜態便須覆其巢穴不可更有招撫劉稹縱有表  
章請自面縛不得便自報答亦須奏聞當務遠圖勿拘小  
信速宜攻討以副朕懷想宜知悉

賜張仲武詔意

昨以李石文吏不可自赴行營令在太原應接戎事緣親

兵在外城府空虛楊弁糾合征師眾纔一旅追逐主帥擅  
領兵權尋詔近地行營量抽兵馬便令剪撲計日梟夷緣  
鎮州地接土門最爲便近已詔元達出師五千人爲向南  
諸軍聲援顧茲小寇未足勞卿大軍緣何清朝下河水官  
健曾經楊弁將領久與亂軍同處恐其自思家屬因此搖  
心宜速與卿本道都頭密意動靜與清朝計會犄角相應  
如萬一清朝官健禁戢不定抽歸太原已令把絕鴈門遏  
其歸路卿便須出軍掩襲勿遺漏失兇徒每事與清朝商  
量務從權便應機在速不更待奏聞

賜劉沔詔意

勅自古出師莫重謀帥李廣臨塞威動殊鄰吳漢理軍陰如敵國舉茲制勝方見成功往者羯胡亂華伊洛未靖光弼以上勛元宰移守盟津即知急病捄艱因事爲重以卿近破狂虜已著英名河內當賊咽喉爲吾雄屏爰求威望將以撫寧昔漢光武謂寇恂曰潁川迫近京師當以時定惟念卿獨能平之從九卿復出憂國可知也卿勿以累換雄藩輕此寄任策勛之日遷擢必殊詔到便宜擇精兵二千人自領赴鎮直抵萬善震耀威聲壯忠武一作捕鹿犄角之

形分常蛇首尾之勢今屬水潦將至農事已興偃武息人  
固難淹久勉宏方畧副朕誠懷

賜王宰詔意

將帥大畧前史備書保境者以守險自固進攻者以過險必剋制其死命務須批亢今賊在網羅只守巢穴廣立虛柵多設疑兵蓋謂自防豈暇侵軼且欲偷安歲月以老王者卿分兵相守果中奸計況卿已得天井尋扼咽喉游刃其間更何顧慮聞天井前後寨柵二十餘所以備奔衝如此費兵固須寡力料賊四面設備兵數可知卿進大軍便

須拒捍何暇更於諸路敢軼封疆以近事明之足可爲據  
昨者榆社兵馬盡赴太原自沁至儀五百餘里賊已却得  
石會其間細路至多數旬無備竟不馳突卿以此揣度可  
見其情又諸軍都頭各守一寨遷延避寇苟務過時卿若  
更廣詢謀取其自便必恐撓卿思慮難見成功卿宜密度  
事機自爲心計其賊路逼近州縣及當卿腹背受敵之處  
即須留兵防守用備寇虞其他抽隨大軍併力攻討如此  
則出其不意必覆妖巢國家無徵發之勞計司減饋運之  
費足得制勝豈在濟師又聞每度出兵傷夷不少待其瘡

痛皆復不免戰鬪閼人今爲卿方圓無所愛惜其陣沒官健如無子弟便別擇少壯者充替其亡歿家糧賜亦許不停其傷夷校重有妨役使者亦任擇人充替其傷夷者仍不停糧非惟感勵士心亦冀漸完兵力卿宜以此宣示各使聞知故令中使專往看卿處置須待事了方得遣回謹按

集有賜石雄詔意與此篇畧同於奸計下云聞冀氏翼城寨柵有一十八所以備奔衝自此以後又同宰詔于各使聞知下云又聞將士有苟避兵鋒全不得力者卿宜便令守寨不要將行其彥佐隨使衙隊自大將至晏設及工巧之徒除卿先令歸本道外聞在者尤多卿旣領節旄自有土地并宜曉諭發遣不要更留仍具人數奏聞雖卿善於撫眾皆自樂從然亦在割情不令撓事故令中使專往看卿處置卿須待了方得遣回

賜王元達何宏敬詔意

比緣暑熱未退固難進軍想卿至誠豈安終食今清商已  
至鼙鼓聲雄白露將凝戈鋌氣肅擊隼應節而逾勵代馬  
嘶風而自豪順天行誅正在今日近者天井冀氏頗有交  
鋒蓋緣卿等當軍未抵邢州莫分賊勢併有精卒得以奔  
衝今四面王師一十萬鎮魏兩軍自當其半屯集在境已  
及歲期雖罰罪除殘誠無所吝然人生膏血杼軸其空朕  
既爲父母豈有坐延歲月想卿忠憤固不懷安況卿當道  
頃爲盧從史劉從諫所敗與澤潞素是深讐卿之騎兵海

內精勁將虔劉殘憤士有鬪心宜乘此機豈可玩寇想詔  
到之後速抵邢州但得綴其精兵不令併力西向朕當詔  
王宰石雄齊心攻討破此殘寇決在今秋故令中使往諭  
朕意想卿勿更疑惑副茲朕懷謹按何宏敬詔中改未抵  
下改爲卿奉親之孝朕所深知想陟岵有懷循陔  
邢州爲未過漳河況字以  
思養違離周歲固切歸心當早決機豈宜玩寇

賜王元達何宏敬詔意

近頻捉得賊界生口及收得投降人等每知賊中精卒數  
亦無多只是應急旋抽併當一面破其此計實在共攻緣  
王宰即過乾河便抵澤州城下恐賊併取山東兵馬抗拒

南面王師卿宣詔到日便須深入綴其精卒不遺東西旬月免有掠兵王宰必能成事如因此犄角便克澤州則卿之功勳更高王宰朕每念陳兵原野又屬炎熱由此孽童致茲暴陵然猶狃孔亟周宣興六月之師淮夷未寧公且有三年之役事非獲已諒匪勞人卿當深體朕懷早圖戡剪上薦功於宗廟下息患於生靈則卿之子孫永受休祿朕之酬賞必極寵榮布告三軍咸令知悉

賜緣邊諸鎮密詔意

近者寇孽初平海內無事方欲永繫弓矢保乂生人國遠

開邊誠非朕志然盛衰倚伏皆有其時古人云聖人無巧時變是守蓋惜其時也昔漢武帝命將出師輕齋深入耗中國三十餘年竟不得臣伏匈奴蕩定沙漠此未得其時也至宣帝值匈奴百年之運因壞亂危亡之機單于稽首三代稱藩鋒燧不設邊城晏開此遭遇其時也近則回鶻常以兵助中國有戡難之功朝廷累降姻親歲致繒絮因我爲緣振服諸蕃百有餘年最爲強盛及本國衰亂種落流離景附北邊猶爲傑鷺因其入塞暫舉偏師遂大破穹廬却收公主歸降甚眾梟戮至多一國銷亡易於拉朽豈

非得其時也今吐蕃未立贊普已是三年將相猜攜自相攻擊緣邊兵馬頗已抽歸想其城鎮皆空守備多闕倘彼鬪戰未定自有黨讐一國之中疑懼相半則備邊城守固有異心計卿軍鎮必有舊人諳練邊事深入窺探來往是常易知隱伏之情足見存亡之兆宜精意選練務得其人切須識見精專誠信可保資以財帛俾其陰通自隴山天寧關北至蕭關原州安樂州烏蘭橋等皆是賊之險路入寇要津各要知兵馬多少何人主領如兵數寡少人心動搖乘此危機必易爲計多設反間密用奇謀使自歸心豈

勞兵力觀釁而動取若拾遺此兵法所謂不戰而屈人之  
兵善之善也國家河西隴右四鎮一十八州皆是吐蕃因  
中國有難相繼陷沒今當其破滅之勢正是倚伏之期取  
亂侮亡聖人遠畧斯乃以直報怨非是不守和盟想卿精  
忠必達此旨故令劉濛專往親諭朕懷卿宜選練師徒多  
蓄軍食使器甲犀利烽火精明尺籍伍符盡無虛數務修  
實效勿顯事機制置之間尤須密靜詔書有所不盡皆已  
指示使臣勉建良圖副茲委遇

賜王宰詔意

卿頃莅澤州頗彰惠政彼之黎庶自合有情申以恩威正  
在今日卿宜大布誠信且務綏懷不得焚其室廬剪其桑  
梓自當壘漿塞路襁負而歸兼招取丁壯三五千人不要  
分給器械每至填壠攻壘皆遣先驅料澤州城內非其父  
兄即其子弟必令自相愛惜豈願交接兵鋒兼宜遣使逼  
其軍城再三號令若能捨逆效順速自歸降非但生全仍  
加優賞克城之後不犯秋毫如堅守危巢坐待撲滅必當  
不存噍類務極兵威料其聞此先聲皆自感勵勉於方畧

副朕深懷

處置楊弁勅

勅楊弁起於卒伍獲在偏裨方屬徂征敢爲桀逆追逐我  
帥嘯聚叛徒朕姑務苟安未加顯戮舍其悖亂令赴行營  
遂駐南轍之軒已盜北門之管戰備符璽弁而竊之啟石  
會重關潛輸逆稹釋賈羣繩綽俾遠奸謀惑榆社之義心  
召橫水之同惡薦毒近發於懷袖蟻壞幾漏於江河康政  
等被粉邑之遺風習華墟之有禮遽亡臣節仍助凶威撫  
弦登陴曾不興嘆以卵投石自取滅亡雖禁暴除殘國之  
大典然俾其陷辟終用愧懷

誅郭誼等勅

勅理體魄者不可以芒刃圖蔓草者必絕乎本根故前代  
陳甲兵以正其刑伐鐘鼓以聲其罪爰用重典庶清亂邦  
逆賊郭誼等狐鼠之妖依邱穴而自固牛羊之力得水草  
而逾凶久從叛臣首負逆氣頃自劉從諫背德反義掩賊  
藏奸稽其怙亂之謀無非親吏之計劉公直安全慶等各  
憑地險屢抗王師每肆悖言靡懷革面吳寇將敗周邱尚  
務於陸梁隴坻向平王捷猶偁於必死況郭誼王協聞邢  
洺歸款懼義旅覆巢賣孽童以圖全據堅城而請命擐甲

以祈於撫納要君以蓋其前憊天地神祇所難容舍昔伍  
被詣吏不免就誅延岑出降終亦夷族致之大辟無所愧  
懷郭誼王協劉公直安全慶李道德李佐堯劉武德董可  
武各宜處斬其餘反黨各從別勅處分

誅張谷等告示中外勅

勅頃者劉從諫與李訓鄭注結刎頸之交濟其奸謀以圖  
不軌張皇兵力脇制朝廷自擅一方外爲三窟張谷陳揚  
庭等皆凶險無行狡詐多端比在京師人皆嫌惡自知險  
薄無地庇身投迹戎藩寄命從諫久懷怨望得肆陰謀或

妄設妖言成其逆志或僞草章表飾以悖詞既無禮於君  
親曾不愧於天地自朕君臨萬宇姑務含容而怙亂益堅  
包藏未息誘受亡命招聚逆徒志猶恃於金湯心不利於  
王室近又敢爲狂計挾助孽童汚我忠義之軍叶其豺豕  
之黨神之所棄人得而誅逆賊劉稹弟曹九滿郎君郎姊  
四娘五娘堂兄洪卿漢卿周卿堂弟魯卿匡堯等張谷并  
男涯涯男解愁陳揚庭弟宣力男醜奴張溢并男歡郎三  
寶等門客甄戈伎術人鄭諗蔣讜逆賊李訓兄仲京郭行  
餘男台王涯姪孫與韓約男茂章茂實王璠男珪并就昭

義梟斬訖夫爲善者天報以福爲惡者天報以殃今沴氣  
既消逆節咸服方布和於四海庶息患於五兵宣示中外  
各令知悉

賜回鶻可汗書

勅我國家臨統萬寓列塞在陰山之南先可汗惣率本部  
建牙於大漠之北各安土宇二百餘年此天所以限隔內  
外不可逾越近聞爲紇扢斯所敗加以饑荒國邑爲墟屍  
僵道路今可汗稍收離散漸近邊城將議遠圖今先文誥  
故茲命使宜聽朕言可汗累代以來推誠向國往者中原

有難助剪羣兇列聖念功每加優寵寧國咸安二公主降嫁龍庭爰及先朝復以今公主繼好又以土無絲纊歲遣縑繒恩禮轉深諸蕃稱羨久保誠信兩絕猜嫌但以國家舊章藩漢殊壤稍逾經制豈朕所安去歲溫沒斯特勒已至近界邊將憤激便請祛除朕念其無主可歸且令安撫今可汗既立彼又降附便合率領漸復舊疆漂寓塞垣殊非良計又得宰相韻干伽思等表借振武一城權與可汗公主居住中國之制與外蕃不同須守前代規模祖宗法度昔漢朝單于乖亂呼韓款塞宣帝送單于出朔方雞鹿

塞唯賑以米粟國初太宗皇帝命李思摩建牙於漠南遺  
趾并存事皆可驗未有深入漠界借以一城與退渾黨項  
微小雜種同爲百姓實亦屈可汗之尊貴亂中國之舊規  
若以未復本蕃或欲別遷善地求大國聲援戢諸部交爭  
亦須率思歸之人且於漠南駐止朕當許公主朝覲親問  
事宜倘須應接必無所吝冀令彼國從此輯寧豈不謂去  
危就安轉禍爲福朕緣公主將可汗丹誠來告深感於衷  
制置之間須存遠大故遣右金吾衛大將軍兼御史大夫  
王會副使宗正少卿兼御史中丞李師偃馳往喻懷爰定

所居便申誓約神明是質豈可食言可汗并保一心自求  
多福

賜回鶻書意

朕想可汗公主以久修鄰好累降嘉姻望我國家如歸親  
戚朕每宏容納之意固無纖芥之嫌但以將相大臣累陳  
公議以可汗代居絕漠臨長諸蕃名聲既雄部伍甚衆今  
逗留塞上逼近邊城百姓不安人心疑惑耕種盡廢士馬  
疲勞朕二年以來保護可汗一國內阻公卿之議外遏邊  
將之言朕於可汗心亦至矣可汗亦須深見事體早見歸

還所求種糧及安存摩尼尋勘退渾党項劫掠等事并當應接處置必遣得宜唯是擬借一城自古以來未有此事天地以沙漠山河限隔南北想蕃中故老亦合備知只如長安東有潼關西有散關南有藍田關北有蒲關今四海一家天子所都猶有限隔况蕃漢殊壤豈可通同且天下者高祖太宗之天下朕守祖宗成業常懷兢畏豈敢上違天地之限中隳祖宗之法每欲發一號施一令皆告於宗廟不敢自專所借一城理絕言議想可汗便須息意勿更披陳其餘令楊觀專往示喻朕意

賜回鶻可汗書意

楊觀至覽表欲求糧食牛羊糧食已許自己馬價絹就振  
武和糴三千石緣中國以農爲本最貴耕牛百姓所蓄無  
多常斷屠殺羊則產於北土不出中華惟塞上蕃渾各有  
畜牧朝廷未嘗徵率務使安存今之所求難允來意又所  
請束縛嘔沒斯送歸者嘔沒斯比自投邊將屢獻誠款自  
本國破亡之初奔逆先至塞上不隨可汗公主已是二年  
慮彼猜嫌自懷憂懼窮迫歸命望朕保持未嘗有交構之  
言離間兩國前可汗已緣失制馭之道無兼愛之仁侵擾

諸蕃肆爲暴虐所以親屬內叛部落外離國破家殘實由於此今可汗失地遠客危難之中尤須追悔前非以安反側若又仁愛不至骨肉相殘可汗左右信臣誰敢自保朕統萬國非止一蕃未附者須務懷柔歸誠者因宜存撫倘徇可汗之意殊乖覆育之恩今已特許歸降止於存其種族必不別有任使授以腹心在可汗不失恩慈於朝廷免虧信義豈不兩全事體深叶良圖况前代以來盡有故事漢朝呼延邪單于款塞其下大將烏鵲屈烏鵲溫敦并來降附漢宣帝封以列侯又國初頡利可汗之破敗也降者

甚眾酋豪首領至朝廷皆拜將軍僅百餘人無不撫納想  
可汗深明朕意勿更再論摩尼教天寶以前中國禁斷自  
累朝緣回鶻敬信始許興行江淮數鎮皆令闡教近各得  
本道申奏緣自聞回鶻破亡奉法因茲懈怠蕃僧在彼稍  
似無依吳楚水鄉人性嚚薄信心既去翕習至難且佛是  
大師尚隨緣行教與蒼生緣盡終不力爲朕深念異國遠  
僧欲其安堵且令於兩都及太原信嚮處行教其江淮諸  
寺權停待回鶻本土安寧即却令如舊

賜回鶻可汗書

朕自臨寰區爲人父母惟以好生爲德不願黩武爲名故  
自彼國不幸爲紇扢斯所破來投邊境已厯歲年撫納之  
間無所不至初則念其饑歉給其餕糧旋則知其破傷盡  
還馬價前後遣使勞問交馳道路小小侵擾亦盡不計今  
則可汗尚屯近塞未議還蕃朝廷大臣與四方節將皆懷  
疑忿盡請興師雖朕切務含宏亦所未喻日昨數使却回  
皆言可汗只待馬價及令交付之次又聞所止屢遷或侵  
掠雲朔等州或讐掣羌渾諸部未知此意終欲如何若以  
未交馬價且近塞垣行止之間亦宜先告邊將豈有倏來

忽去遷徙不常雖云隨逐水草動皆逼近城柵遙揣深意  
以恃姻好之情每觀蹤跡實懷馳突之計況昨到橫水柵  
下殺戮至多蕃渾牛羊豈恠驅掠黎庶何罪皆被傷夷所  
以中朝大臣等皆云回鶻近塞已是違盟更戮邊人實乖  
大義咸願因此剪逐以雪殂謝之寃然朕志在懷柔情深  
屈已寧可汗之負德終未忍於幸災石戒直久在京城備  
知仁心憤惋發於誠懇因請自行嘉其深見事機不能違  
阻可汗審自詢問速擇良圖無至不悛或貽後悔

賜太和公主勅書

勅姑遠嫁絕域二十餘年跋履險難備罹屯苦朕每念於此良用惄然恭惟太皇太后春秋已高慈愛深厚比者望姑朝謁再敘悲歡倏已歲暮寂無音耗想姑見舊國之城邑能不銷魂望漢將之旌麾必當流涕今朔風旣至霰雪已零絕國蕭條固難久處旃牆罽幕何以禦冬肉飯酪漿且非適口朕撫臨萬寓子育羣生一物未安終食三嘆况姑累年漂泊何日忘懷想姑高明必是懸鑒姑承宗廟之餘慶爲王室之懿親先朝割愛降婚義寧家國謂回鶻必能禦侮安靜塞垣使邊人子孫不見兵革射獵者不敢西

向畏軒轅之臺今回鶻所爲甚不循理蕃渾是朕之人百姓牛羊亦國家所有因依漢地遂至蕃華回鶻託以私仇恣爲侵掠每馬首南向姑得不畏高祖太宗之威靈欲侵掠邊疆姑得不思太皇太后之慈愛爲其國母足得指揮若回鶻能不稟命則是棄絕姻好今日以後不得以姑爲詞若恃我爲親稟姑教令則須便自戢歛以繼舊歡想姑以朕此書喻彼將相令其知分更不徇非塞外祁寒且無絲纊朕每御裘服則思彼未授衣豈可回鶻譸張遂忘親愛今寄冬衣若干具如別錄

欽定全唐文卷七百目錄

李德裕

五

賜背叛回鶻勅書

與紇乾斯可汗書

與黠戛斯可汗書

與黠戛斯王書

賜黠戛斯書

賜石雄及三軍勅書

賜潞州軍人勅書意

賜党項勅書

停歸義軍勅書

置孟州勅旨

李回宣慰三道勅旨

上尊號玉冊文

上尊號玉冊文

讓官表

讓太尉第二表

讓太尉第三表

讓官表

賀廢毀諸寺德音表

薦處士李源表

欽定全唐文卷七百

李德裕

五

賜背叛回鶻勅書

近數得邊將奏報知卿等本國自有離亂可汗遇禍雖未悉虛實良深震悼我國家與卿等本國代結姻好久爲親戚協德同心常爲諸蕃所羨故得邊候不聳封疆晏然卿等忽領師徒漠南屯集又數至天德侵掠頗擾邊人聚師無名忠義俱失旣乖舊好良用撫然若卿等本國所立新主非可汗至親人心不從擾亂未定卿等只合自申方畧

竭效忠誠安靜本蕃以圖勲績亦合遣使告朕具述此心  
若新立可汗是中國至親人已歸附卿等便合早自相率  
保國寧家與可汗協心以修舊好豈得寄命塞上久勞師  
人朕緣與卿本國情義至深事同一體又緣公主在彼未  
知存亡故遣使臣魏暮往諭朕意卿宜備陳誠欵不得虛  
詞兼禁戢師徒勿爲侵軼近聞天德遊奕軍將曾有交鋒  
卿等旣犯塞垣亦是邊將常事今已各令諸鎮不許交兵  
卿宜曉諭部落各令知悉

與紇托斯可汗書

皇帝敬問紇托斯可汗時屬載陽想彼休泰朕撫臨萬寓  
子育羣生思致洽和用臻至理將軍踏布合祖等至鑒表  
具知可汗生戴斗之鄉居寒露之野智謀精果材志沉雄  
威動龍荒聲馳象魏眷言不績深用注懷我太宗文皇帝  
聖德高於百王英材軼於千古內定諸夏外服百蠻貞觀  
四年西北蕃君長詣闕頓頰請上尊號爲天可汗是後降  
璽書西北蕃君長皆稱皇帝爲天可汗臨統四夷實自茲  
始暨貞觀六年太宗遣使臣王義宏至可汗本國將命鎮  
撫貞觀二十一年可汗本國君長身自入朝太宗授左屯

衛將軍堅昆都督至天寶末年朝貢不絕則可汗祖先已受我國家恩德計可汗國中遺老必自流傳朕纘奉丕圖思申舊好比聞天寶以後爲回鶻所隔久阻誠款回鶻自謂天驕罔修仁義肆行殘忍凌虐諸蕃知可汗代爲仇讐果能報復滅其國邑皆已立君驅彼酋渠盡逾沙漠茂功壯節近代無儔回鶻當中國伐叛之時嘗展勲力列聖嘉其大順累降姻親今失國亡逃寄於塞上只合早歸窮款受朕撫循而乃轉自鴟張益懷狼顧在陰山之外誘惑小蕃乘我無虞即來侵掠恣爲邊患今已四年朕大徵甲兵

久欲除剪比令幽州太原兩道節度使皆充招撫以示綏懷望其悛心猶務含育而凌蔑公主頻擬傷殘馳突邊城敢謀盜竊近太原節度使劉沔不勝其忿潛出偏師乘其誇張使襲牙帳虜眾大潰穹廬盡焚元惡傷殘脫身潛竄已取得太和公主即至闕庭回鶻殘兵不滿千人散投山谷旬日之內必合巢禽朕再見公主良用欣慰可汗旣爲讐怨須盡殲夷倘留餘燼必生後患想遠聞慶快當愴素心聞可汗受氏之源與我同族漢北平太守材氣天下無雙結髮事邊控弦貫石自後子孫多習武畧代爲將門至

嫡孫都尉提精卒五千深入大漠單于舉國來敵莫敢抗威身雖陷沒名震蠻貊我國家承北平太守之後可汗又是都尉苗裔以此合族尊卑可知昨聞太和公主爲可汗兵眾所得可汗以同姓之國使遣歸還有以見可汗秉禮義之心重親隣之好朕深用感嘆至於涕零公主尋爲回鶻劫奪久不歸國可汗所遣使臣皆被誅戮朕言念傷痛至今不忘昨見可汗表求訪公主使公主上天入地必須覓得今邊將憤惋已立奇功回鶻罪人計日可致即當顯戮以謝可汗况回鶻夷滅種族必盡與可汗便爲鄰國各

保舊疆繼好息人事同一體從此邊陲罷警弓矢載橐必  
當諸部服從皆懷健羨知我兩國永爲宗盟想可汗明智  
自有良算故令太僕卿兼御史中丞趙蕃持節充使以答  
深誠質於神明用存大信朕言不貳可不勉歟又自古外  
蕃皆須因中國冊命然後可彈壓一方今欲冊命可汗特  
加美號緣未知可汗之意且遣諭懷待趙蕃回日別命使  
展禮以申和好彼間將相並存問之遣書指不多及

與黠戛斯可汗書

皇帝敬問黠戛斯可汗溫仵合將軍至覽書及所獻馬百

匹鶻十聯具悉可汗特稟英姿生知雄畧奮揚威武底定  
龍荒掃回鶻之穹居報怨以直護公主之屬幕事大以誠  
又遣貴族信臣載馳朔漠名馬鷺鳥遠涉流沙旣展同姓  
之親克副懷柔之旨眷言勲績深慰予衷朕護奉不圖撫  
寧萬國豈望化孚有截致殷湯來享之明實恐德未徧覆  
愧漢宣兼臨之盛況與彼國壤隔內外非正朔所加禮旣  
不施政豈宜及但以惜可汗宗盟之國願保先名爲可汗  
宏遠之謀須除後患所以具古今禍福往諭至懷昔呼韓  
邪單于以郅支尚存國難未靖稱蕃事漢福及子孫後漢

單于比以大父依漢而安繼襲其號上書款塞永願藩蔽  
漠南遂致朔塞底寧烽燧永息近則回鶻結大國之援雄  
長北蕃諸部率從莫敢不服一隅安樂百有餘年此事昭  
然可汗所覩况今回鶻種類未盡介居蕃漢之間爰及黑  
車子久畏其威素服其信慮彼再振常持兩端須令小蕃  
知朕親厚可汗棄絕回鶻實在和好分定內附約盟則邪  
計奸謀無由而入故欲顯加冊命昭示萬方况登里可汗  
回鶻舊號是國家頃年所賜非回鶻自制此名今回鶻國  
已破亡理當嫌避朕以可汗先祖往在貞觀身自入朝太

宗授以左衛將軍堅昆都督朕思欲繼太宗之舊典彼亦宜遵先祖之明誠便以堅昆爲國施於冊命更加美號以表懿親况堅者不朽之名昆者有後之稱示不忘本豈不美歟朕昨命禮部尚書鄭肅等與彼使臣面陳大計溫仵合將軍等皆諭朕旨願言結成豈必契徑路之金舉留犁之酒保茲誠信固在厥初頃者回鶻至塞上請國家精兵十萬送至漠北漸歸本蕃又請借漢界一城養育疲羸以圖興復朕以可汗之故盡不聽從今回鶻是國家叛臣爲可汗讐敵須去根本方保永安是天亡之時易於攻取古

人云天與不取反受其咎可汗須乘此機便早務芟夷回鶻未滅以前可汗勿以飲食爲甘弋獵爲樂勵兵秣馬不可暫閑所恨隔在諸蕃國家難於同力倘更近塞豈復稽誅又恐餘孽歸降可汗未能盡戮納有罪之眾受逋逃之臣倘收吾憎必開邊隙此則蕃養虺毒自生厲階前年回鶻宰相等向漢使云李靖擒頡利後國中只有三二十人便郤興復雖在危困尚爾張皇可汗深察此言豈得不慮又聞合羅川回鶻牙帳未盡毀除想其懷土之心必有思歸之志速要平其區落無使子遺既表成功彼當絕望可

汗已據積年之憤自爲一代之雄至於居處服章皆宜變  
革焉得安於所習姑務因循則何以震耀北方彈壓諸部  
朕撫有中夏愛育生靈常恐百姓未安一物失所豈願更  
廣威畧遙制要荒但緣與可汗方保和盟義同憂樂纖微  
之事皆欲備言想可汗與將相籌謀副茲誠意此使到日  
必諒朕心即宜速遣報章此當遣重臣冊命夏熱想可汗  
休泰將相以下並存問之遺書指不多及

與黠戛王書

皇帝敬問黠戛王時及陽和想比佳適注吾合素等至省

表并進馬事具悉國王陰山雄勁朔野英雄包智畧以周身推誠明而有眾聲高夷落威重藩疆專遣使臣遠獻名馬嚮化之誠既展輸忠之効頗明臨軒省章輶食嘉歎眷言忠盡寧忘寢興頃於貞觀中彼國常奉朝貢亦授官爵寵賜而還爾後但訝音耗久乖不知中爲回鶻所隔及覽來表方嘉壯圖蓄銳多年乘機大舉快雪冤憤豁開心懷回鶻之營壘旣平國家之山河不間旣爲鄰境遂閲貢章又知破回鶻之時取得太和公主特遣專使送歸闕庭雖聞行至中途却爲回鶻所奪在國王遵以禮義推之和寧

遠同族之譏嫌厚親鄰之恩信賢明如此愧慰難名回鶻  
頃以失國爲詞款塞相託朕以勲親是念拯卹屢加曾不  
知恩漸開稔惡賤棄公主侵暴平人日尋干戈時竊牛馬  
朕爲全舊好不下明誅歲月滋深邊防將倦各用長策繼  
彰殊勲焚帳幕而公主歸還透網羅而元惡逃遁顧其餘  
類何所寄生國王遠聞想同深慰然猶恐奔竄尚有凶姦  
又慮侵彼封疆將復讐怨國王亦須嚴爲備擬善設機謀  
同務討除盡其根本無貽後患勉繼前修親仁善鄰惟彼  
與此勿謂遐遠常存寤思因注吾合素回且先詔示其他

禮命續專遣使宣慰想宜知悉

賜黠戛斯書

皇帝敬問黠戛斯可汗將軍諦德伊斯難殊至覽書并白  
馬二匹具悉可汗降精斗極雄朔漠以稱君稟耀旄頭分  
天街而建國特負英豪之氣夙推統御之才眷想嘉猷載  
深寤嘆來書云溫仵合將軍歸國後漢使不來溫仵合去  
日朕書具云速遣報章此當遣重臣冊命自是可汗未諭  
此意報答稍遲此則尋欲遣使只自延望來信又云金石  
路已隔絕蓋爲山川悠遠未得自與可汗封壤接連非是

兩國之情猶有阻隔想可汗明識無復致疑又云兩地遣書彼此不會且書不可以盡言言不可以盡意況蕃漢文字傳譯不同只在共推赤心永保盟好豈必緣飾詞語以此交歡每欲思維先恩好意不更疑惑便是明誠又云欲除却兩楹間惡刺此之一事實是嘉言緣回鶻雄據北方代爲君長諸蕃臣伏百有餘年今可汗掃其穹居大雪讐恥功業既高於前古威聲已振於北荒固當深務遠圖豈可更留餘燼黑車子不度德量力敢保寇讐則是輕侮可汗獨不向化此而可忍孰不可容况可汗前來云求訪公

主使上天入地必須覓得今若舍而不問何以取信朕懷  
想可汗乘彼盛秋長驅精騎問回鶻逋逃之罪行黑車後  
服之誅取若拾遺役無再舉從茲盪定豈不美歟來書又  
云送公主到彼無一語來緣公主纔離可汗五日便被回  
鶻劫奪所遣來使盡被殺傷公主二年之中流離沙漠事  
已隔遠所以不再敘言然趙蕃去日已具感悅之心足表  
殷勤之意又聞今秋欲移就回鶻牙帳滅其大國便保舊  
居足使諸蕃畏威回鶻絕望稍近邊境頗謂良圖所云請  
發兵馬期集去處緣黑車子猶去漢界一千餘里在沙漠

之中從前漢兵未嘗到彼比聞回鶻深意常欲投竄安西  
待至今秋朕當令幽州太原振武天德緣邊四鎮要路出  
兵料可汗攻討之時回鶻必當潛遁各令邀截便可梟擒  
此是軍期須合符契想可汗必全大信用叶一心諦德伊  
斯難殊朕已於三殿面對兼賜宴樂並依來表不更滯留  
朕續遣重臣便申冊命故先達此旨令彼國明知冊命之  
禮並依回鶻故事可汗爰始立國臨長諸蕃須示鄰壤情  
深宗盟義重以此鎮撫誰敢不從宜體至懷共宏遠畧春  
暖想可汗休泰將相以下並存問之遣書指不多及

賜石雄及三軍勅書

勅石雄晉絳密邇王畿地當襟帶自卿與將士等扼其險要勇冠諸軍捍彼奔衝爲我砥柱每刻期深入屢挫狂鋒批抗擣虛導款遊刃永言勲績豈忘於懷昔商伐鬼方三年乃剋周公東征三年不歸憲宗平淮西文宗定滄海士不解甲或三四年想卿等久在戎行心經此役且士之生代本爲功名仗義從軍固當殉命居平則孝養父母成長則子孫衣食所資無非國力有事則投袂而起負甲先登撫養之恩惟此爲報今者纔近半歲未曰勞師功在垂成

往無不捷將士等各宜感勵成此功名上黨既平天下無事從此永安家室不復征行近者楊弁首爲猖狂扇惑亂卒今則身膏齊斧戮及妻孥生爲不忠之人死爲負義之鬼身名俱滅可不痛哉諸部旣安王師益振乘此聲勢必殄餘妖故令中使宣慰兼賜優賞卿等便須鼓行而進徑入賊界下營從此駐軍速圖進取勿使功業歸於別帥爵賞在於他人勉務壯圖副茲厚遇想宜知悉

賜潞州軍人勅書意

劉稹乳臭駢童未有所識皆是郭誼王協幸其昏弱矯託

軍情妄獻表章欲求繼襲志在肆行禍福自擅兵權稱惑  
從諫之恩誓同生死及見山東三郡皆已歸降事迫勢窮  
歸惡劉稹令其一門受戮便欲自取寵榮不義不忠古無  
其比朕以誘陷劉稹皆是此二人販賣圖全義難容捨已  
令澤潞冀氏兩路遣軍只取郭誼王協及同惡之類其他  
軍人一切不問仍各有優賞後從勅處分如兩道兵馬未  
到以前有忠義之士先非同惡者能自擒戮郭誼等所與  
優賞並同裴問王釗例處分已詔石雄王宰到彼不令侵  
擾軍人百姓如秋毫有犯便按軍法各宜勉思機計共保

忠誠勿受奸人扇動妄生疑忌互相告報咸使明知

賜党項勅書

勅自爾祖歸款國家依附邊塞爲我赤子編於黔黎牛馬  
蕃孽種落殷盛不侵不叛頗効信誠比聞邊將不守朝章  
失於綏輯因緣征斂害及無辜念爾遠人莫知控告特命  
朕之愛子實總元戎所冀羣帥聽命而不敢自專諸部懷  
寃而有所披訴奉我憲令以保和寧如聞莫顧私恩遂懷  
憑恃攘奪不避於官物驅掠罔憚於平人擅興甲兵恣行  
攻劫豈有朝廷內地輒此鶻張道路阻艱商旅殆絕朕便

欲詔命諸鎮同力勦除深慮玉石難分善惡同斃今再爲  
條制各使得宜却令節將指揮許其處斷如實有寃濫政  
乖公平並遣巡院奏聞朝廷必爲申理如或不知恩貸猶  
敢猖狂國有典章必難容捨故茲宣示當體朕懷

停歸義軍勅書

勅李思忠首率蕃兵歸誠向闕念其忠款特許來朝而又  
久慕華風願留京邑俾參環衛用報勛庸其歸義軍使宜  
停將士等同叶義心所宜優寵況聞諸道軍鎮皆置馬軍  
選擇蕃渾尤不易得緣此將健久工騎射頗出常倫列於

牙旗足壯戎闖宜分諸道節度使團練收管便給本道衣糧稍加安存務令得所

置孟州勅旨

勅昔馮異之守盟津已建軍號近光弼之保伊洛先據三城蓋以河有造舟之危山有摧輪之險左右機軸表裡金湯既當形勝之地實爲要害之郡令所制置豈限常規積萬庾於敖前尤資地利列二矛於河上須壯軍聲其河陰縣宜割屬孟州仍改爲望縣其河清縣却還河南府收管縣官等並准前勅處分其東都鎮遏兵馬依前屬東都防

欽使鄭滑汝州防戍兵各一千人令宏敬權指揮事平後  
續有處分

李回宣慰三道勅旨

勅成德軍魏博皆出兵甲俯臨賊境秋氣已至攻取是時  
元達宏敬制勝伐謀必有成算固須命使遠訪嘉猷又回  
鶻雖已遁逃尚存餘燼今朔風始勁塞草具腓猶慮未革  
梟音敢懷狼顧迫於饑窘復擾邊城仲武久欲蕩除俾無  
噍類成其志業壯彼威聲亦在使臣往喻朕意各宜奮厲  
早建殊勛解甲來還免彼祁寒之候止戈除害庶臻仁壽

之期咨爾帥臣副茲委遇宜令刑部侍郎兼御史中丞李回充幽州鎮魏等道宣慰

上尊號玉冊文

維會昌二年歲次壬戌四月乙丑朔十四日戊寅攝太尉光祿大夫守司空兼門下侍郎同中書門下平章事臣德裕銀青光祿大夫守尚書左僕射兼門下侍郎同中書門下平章事臣夷行金紫光祿大夫尚書右僕射兼中書侍郎同中書門下平章事臣珙銀青光祿大夫守中書侍郎同中書門下平章事臣紳金紫光祿大夫檢校司徒兼太

子太保臣僧孺及文武百官等六千五百七十四人言臣聞義皇首太古之號成湯顯神武之稱我高祖皇王是憲尊名若古貽厥不訓爲子孫之法豈不善始善述哉矧乃巨唐受命繼體承業理運將至大君以興昊穹所以開至聖也曩者明兩未定帝華不協舍允傳聖深惟至公先后所以昭天命也亦猶堯發於唐侯文興於代邸神明之祚不其難哉伏惟皇帝陛下清明溥鬯光耿四海元德莫鄰天休大賚日角見表氣志如神爰初定命正心理物如辰居極而天下無邪矣由是昭德塞違尊賢遠佞禹不自滿

成不敢康閑盤於田不邇於色自閨壺以施王教由家道  
而刑國風去比周覈名實攬乾綱擇聖紀修舊典協誠質  
迄嘉壇款泰乙進正臣以端治表禮故老以求讜言遠無  
蔽獄近無留命祈元祖而膏雨降祀靈岳而嘉穀登省刑  
罰而蓬字消發倉廩而螽螟息去歲龍旂承祀大輅親郊  
捧玉瓊而一獻光靈來格振金石而六變魄寶昭臨然猶  
古訓是學緝熙於道天文炳煥雲漢其章溫恭敬遜承太  
任之教和樂愷悌洽戚藩之心德風偃於羣黎威霆動乎  
絕域又以敬養不逮於長樂昭配未升於禰宮每懷嗣徽

烝烝而慕所以奉若慈訓對越兩儀因心立制永錫其教  
寬虔劉之罪興惻隱之仁迴電收霜爲之反禾及單于慕  
義景附朔邊耀德戢兵謙臨是受至於備文物展國容奠  
不先甲而布甘澤丁辰而廓陰翳和景晏溫卿靄絪緼斯  
所謂神祇之心應矣天人之際交矣於是服冕之士戴鶡  
之倫暨藩侯邦伯黃髮駘背不謀而進曰陛下元默天辟  
輝光日新大矣孝熙四極爰臻誠宜玉版溫潤鏤鴻明之  
德神寶焜耀薦萬斯之年不惟大典不可辭也陛下猶謙  
退固拒至於三四羣臣不已乃曰俞哉夫偏覆包含之謂

仁極深研幾之謂聖憲度著明之謂文鑾夷震懾之謂武  
感而遂通之謂神無思不服之謂孝臣等不勝大願謹奉  
玉冊玉寶上尊號曰仁聖文武至神大孝皇帝伏惟陛下  
乾健不息謙尊而光樂戒其耽禽戒其荒壽乃侔於殷宗  
俗乃厚於成康貽燕後昆受福無疆臣德裕等誠歡誠躍  
頓首頓首謹言

上尊號玉冊文

維會昌五年歲次乙丑正月己酉朔一日己酉光祿大夫  
守太尉兼門下侍郎同中書門下平章事臣德裕光祿大

夫守尚書左僕射兼門下侍郎同中書門下平章事臣悰  
朝議大夫守尚書右僕射兼中書侍郎同中書門下平章  
事臣讓夷朝議大夫守中書侍郎兼戶部尚書同中書門  
下平章事臣鉉及文武百官大中大夫太常卿臣孫簡等  
六千二百二人言臣聞在昔周宣獫狁內侵四牡薄伐以  
定王國則詩人大其功暨於漢宣北夷乖亂呼韓慕義郅  
支遠遁則簡策著其美惟此二代稱爲中興間者開成之  
末星孛如雲螟飛蔽天先帝戚之黎人懼焉乃授至聖遺  
大投艱迄茲成功厥有冥數伏惟仁聖文武至神大孝皇

帝表應龍翼粹舍乾剛神全而正氣凝宇定而天光發智  
燭千里動必察微心鏡萬機物來斯應於是五材用四維  
張建中和之極綴前聖之綱重樞機修法制刑御家之理  
無出壺之言銷讒邪遠佞倖絕背公之黨退好徑之人內  
嚴體貌增堂陛之峻外絕締交去輔車之勢古所謂受命  
於天惟舜獨正也又曰一心定而萬物服惟陛下得之曩  
者北狄矜功耗蠹中國種類磬牙根柢封殖異術肺腑縞  
衣如荼挾邪作蠱浸淫宇內倒懸不解百有餘年既而龍  
祠堙滅攜國款塞質帝女蹙海疆有狼顧平城之心鯨吞

咸洛之志爰命梟將搴旗刈旃兵鑿穹廬火烈荆榛颺罽  
幙碎輶輓六羸遁逃貴主生還剗滅妖迹剿除醜類故名  
王結髮冠帶入臣堅昆稽首鞬譯來獻而又奸臣放命二  
紀陸梁據太行之固下窺洛邑通故絳之道旁睨近關樹  
其遺孽以竊兵柄議者僉曰精兵十萬積穀十年泉魚不  
察湯網宜懸陛下雄斷霆聲羣疑冰釋揚清風而掃雲致  
迅雷而破山任馮異則拔天井而震上黨仗吳漢則發突  
騎而窺邯鄲壘關失險山東奪魄屬有戍邊叛將竊發參  
墟人心搖蕩異議放肆陛下臨朝而言曰二寇獲罪於天

予所不捨未三旬而定晉陽纔朞年而滅潞子不以金購  
豨將多降不勞師克粵首馳報非至德感物孰能臻於此  
乎由是台宰百辟藩屏將帥上言曰成伐東夷而肅慎來  
賀景剪七國而王室乃安莫不始於武功終致刑措將以  
禋上帝薦祖宗宜受鴻名以答元貺陛下猶謙遜而五讓  
之勤請弗已乃屈已以俞之雲漢爲章所以昭法度也神  
明其德所以成教化也巍乎有功帝堯之則也勤於大道  
元祖之訓也臣等不勝大願謹奉玉冊玉寶上尊號曰仁  
聖文武章天成功神德明道大孝皇帝伏惟陛下不有其

名以保其成不德其功以戒其盈享殷宗之福致周道之平熙我王度永振金聲臣德裕等誠歡誠躍頓首頓首謹言

讓官表

臣某言伏以臣之事君猶子之事父若情有所隱志在苟安不事披誠即爲冒寵臣某誠惶誠恐頓首頓首伏惟仁聖文武至神大孝皇帝去邪用相有大舜之功柔遠固存臻漢宣之理故得王道正直海內清和邊朔底寧干戈永戢文明之化方致永熙蠻燭之光所宜自息豈敢虛矯上

負君親臣始自孩童常多疾病逮於壯歲猶甚虛羸屬廉  
問江南荏苒八歲移鎮巴蜀首尾三年暑濕所侵遂成沉  
痼患風毒腳氣十五餘年服藥過虛又得渴疾每日自午  
已後瞑眩失常形骸僅存心氣俱竭唯恐晚歸私第殞盡  
道途臣伏見國史岑文本受委既深形骸頓竭太宗嘗謂  
左右知其將盡韋處厚積以虛憊不早退身侍立之時仆  
於玉階之下臣竊以二臣爲戒不敢遑安所冀陛下宏太  
宗之仁下軫念於無及臣得延處厚之數免自促於明時  
伏望陛下察臣懇誠矜臣衰耗得罷繁務退守州行稍獲

安閑漸自頤養一二年後或冀有瘳臣倘餘齒尚存筋力未朽必當灰身粉骨上報聖慈不任祈恩之至謹奉表

讓太尉第二表

原註第一表舍人撰  
不錄同日更進此表

臣某言臣今日已進讓表驚寵之心不遑啟處再陳恐懼實懼爲煩臣某中謝伏見國初已來授此官惟有七人尚父子儀猶以懇辭而免近者智興載義皆超拜太傅太保只緣朝廷重惜此官裴度守司徒十年竟不遷授以臣僭越必致顛擠况臣旣無汗馬之勞涓塵莫効又有貢薪之疾曠廢至多唯陛下寵以美名榮皆過實而臣覲顏自處

竊位偷安非止獲朝野之譏實恐受神明之譴輒披丹款  
猶冀聽從伏望息罷新恩且守舊秩不任祈恩迫切之至

讓太尉第三表

臣某言臣聞廟器不盈周公戒其必覆馬力已竭顏氏知  
其必顛臣竊感之以憂以蹙臣某中謝昔子文避祿竟之  
逃死治厔辭卿迫於懼禍伏以上公亢極本待勛臣其間  
或授時賢皆是元老臣既非耆艾又乏戰功奉宸算而曾  
靡運籌假英威而未嘗推轂有何勞効蒙此殊榮夙夜自  
思至今戰汗伏見廣德二年九月十七日代宗授尚父汾

陽王此官三讓而免至大厯十四年閏五月三日德宗再  
申前命重授尚父不許陳讓三載而終臣竊思尚父十五  
餘年得延光寵豈非牢讓而致闕一  
字 驚所持昨者恭惟聖

獎至深恩義加等祇受典冊未敢固辭臣伏念齒髮雖雕  
心力猶壯實願贊陛下升平之運見萬方仁壽之期東封  
告成大典咸備然後散金娛老歸守邱園貪全盛時不忍  
自促所以再陳懇款上瀆皇明竭至敬而不敢繁文陳至  
誠而不爲飾讓心懇詞直度獲聽從伏望特追新恩却守  
舊秩臣不任懇迫屏營之至

讓官表

臣某言臣聞道不欲盈元祖之至誠人惡其上魯史之明規既以迫於愚衷敢慮動而生悔臣某中謝臣頃居宰弼獲戾於時既望汨以懷沙甘赴湘而溺死自謂永違白日莫覩青天雖文宗墜履不遺驟分圭瑞而微臣傷弓是懼常蹈春冰伏值陛下大明初升臨照四海知臣常忝禁署逮事穆宗念已廢之舊物憫旣傷之弱羽召自滄海擢授黃閣明德每覆其瑕玼至仁常矜其衰疾參贊萬務倏已六年粢冕禋郊再覩配天之禮于戈問罪三見拘原之功

所謂百生遭逢千載際會徵倚伏之數惟恐罹灾思存亡  
之機所宜知止非慕三公乞骸之節敢希二疏解組之風  
忍去盛時自貽深戚實以久嬰沉痼年漸衰遲宗族孤單  
兄弟衰落先臣松櫟近在東都家屬數人皆居上國不欲  
遠離京闕只願歸老田園伏望陛下深鑒孤忠特遂丹懇  
察臣上報聖德不必須在鼎司改授閑官優游暮齒所冀  
自知稅駕無李斯之嘆音便得懸輿復韋賢之故事進退  
惶灼伏地涕零不任兢惶感切之至謹奉表陳乞以聞

賀廢毀諸寺德音表

臣某等伏奉今日制拆寺蘭若共四萬六千六百餘所還俗僧尼并奴婢爲兩稅戶共約四十一萬餘人得良田約數千頃其僧尼令隸主客戶大秦穆護襖二十餘人並令還俗者臣聞仲尼祖述堯舜憲章文武大宏聖道以黜異端末季以來斯道久廢不遇大聖孰能拯之臣某等中謝伏以三王之前皆垂拱而理不可得而言也厥後周美成康漢稱文景至化深厚大道和平人自稟於孝慈俗必臻於仁壽豈嘗有外夷之教玷中夏之風東漢楚王英始盛桑門之饌淪於左道桓帝更增犀蓋之飾歸於亂政魏之

三祖西晉太康雖君非大聖臣非上哲然猶祖尚老莊斯  
教未行至東晉因吳人之佻薄襲孫權之弊政始建塔廟  
乃譯梵書宋齊梁陳其教浸盛好大不經之說陋乃詩書  
因報拔濟之談隆於仁孝運祚浮促篡奪相尋二百年間  
五變朝市君無殷宗之福臣靡衛武之年感驗寂寥斯可  
明矣高祖神堯皇帝方欲剗除斯弊掃刷中區時屬宰臣  
蕭瑀本梁氏之子孫尋覆車之軌轍廢格明詔以迄於今  
遂使土木興妖山林增構一巖之秀必極雕鏤一川之腴  
已布高剝鬼功不可人力寧堪耗蠹生靈侵減正稅國家

大蠹千有餘年伏惟仁聖文武章天成功神德明道大孝  
皇帝陛下明紹於天粹合於道黜霸圖而功盛入聖學而  
德優常欲天下之動咸貞於一以一言之蔽思必無邪先  
定宸心獨發英斷破逃亡之藪皆列齊人收高壤之田盡  
歸王稅正羣生之大惑返六合之澆風出前聖之模爲後  
王之法巍巍功德煥炳圖書臣竊位樞衡莫能裨益愧無  
將明之効徒懷鼓舞之心千古未逢百生何幸不任忭賀  
踴躍之至

薦處士李源表

臣伏見賈誼云守圉捍敵之臣誠死城郭封疆故曰聖人有金城者此物此志也自天寶之後俗尚浮華士罕仗義人懷苟免至有棄城郭委符節者其身不以爲恥當代不以爲非臣恐風俗既成紀綱皆廢此當今之急務教化所宜先也臣訪聞處士李源即故禮部尚書東都留守贈司徒忠烈公憕之少子天與貞孝嗣茲忠烈以父死國難哀纏終身自司農寺主簿絕心祿仕垂五十年放懷山澤罕至人落暨於衰暮多依慧林佛寺以其本憕別業就寓殘生從僧住持不舉烟爨隨僧一食以至五十餘年嗜欲靡

窺精麤同眾寺之舊殿則澄之寢堂源過必敬趨未嘗登  
踐其端心執孝無有不至忘形患苦絕意貪緣迎斥浮虛  
就專志節則孰能挺操不易沉身無聲處薄自願終老彌  
篤且澄之忠烈實冠古今當逆賊屠陷麟驅響從而澄抗  
節誓心約義同列居朝守位抵刃就終臣節之光輝澄益  
勸而源名銷迹滅徵訪不加實主於居方之臣厯政之闕  
也况源嘗守沉默不語是非或心交靜求理契深要一言  
開析百慮洗然致君阜時指象如見抱此貞用棄於清朝  
臣竊爲陛下深惜伏乞就授一官召赴京闈仍以事迹宣

付史館則聖代有求賢之盛朝廷美得材之難憕之貞烈  
如存源之承荷不墜忠孝之美并集憕門光嗣德於一時  
激爲臣於千古

